



Broj: 03-34-2-781/16
Sarajevo, 21.9.2016. godine

- Institucijama Bosne i Hercegovine

PREDMET: Radno iskustvo stečeno nakon završenog visokog obrazovanja, mišljenje, dostavlja se.-

U dosadašnjem radu, kako Agencije tako i drugih institucija Bosne i Hercegovine, pojavila se određena nedoumica od kada računati potrebno radno iskustvo prilikom provođenja konkursnih procedura. Naime, u raspisanim javnim oglasima pojavljuje se redovno odredba (načelno u rubrici „Napomena za sve kandidate“), koja glasi: „*Pod radnim iskustvom podrazumijeva se radno iskustvo nakon stečene visoke stručne spreme, odnosno visokog obrazovanja*”.

Pitanje koje se pojavilo odnosi se prije svega na priznavanje radnog iskustva u slučaju kada lice nakon sticanja visokog obrazovanja stekne dodatne kvalifikacije istog obrazovanja, u istom ili drugom ciklusu. Preciznije, pitanje koje se posebno postavlja odnosi se na slučaj kada licu, koje najprije stekne visoko obrazovanje koje se vrednuje sa 180 ECTS bodova, nakon čega (u istom ciklusu) stekne visoko obrazovanje koje se vrednuje sa 240 ECTS bodova, počinje teći radno iskustvo relevantno za prijavu na javne konkurse.

S obzirom da se najčešće traži radno iskustvo u struci, važna je odredba člana 43. Odluke o razvrstavanju radnih mjesta i kriterijima za opis poslova radnih mjesta u institucijama Bosne i Hercegovine („Službeni glasnik BiH“ br. 30/13 i 67/15) koji nosi naziv „*Radno iskustvo u struci*“ a kojim je propisano: „*Kao radno iskustvo u struci računa se radno iskustvo koje je ostvareno na poslovima odgovarajuće stručne spreme nakon završene stručne spreme, s tim što se u radno iskustvo računa i iskustvo stečeno sa statusom pripravnika, odnosno volontera.*“. Pored toga, kada se ista odredba primjenjuje zajedno sa odredbom javnog oglasa, ista je primjenjiva i na slučajeve kada se traže druge vrste radnog iskustva (npr. na istim ili sličnim poslovima), samo što se tada koriste dodatni propisani kriteriji za vrednovanje poslova na kojim je lice radilo – član 17. Pravilnika o karakteru i sadržaju javnog konkursa, načina sprovođenja intervjua i obrascima za sprovođenje intervjua („Službeni glasnik BiH“, broj 63/16).

Okvirnim zakonom o visokom obrazovanju u Bosni i Hercegovini („Službeni glasnik BiH“, br. 59/07 i 59/09) kao i Osnovama kvalifikacijskog okvira u Bosni i Hercegovini („Službeni glasnik BiH“, broj 31/11), nije izričito propisan pojam visoke stručne spreme, već je isti zamijenjen pojmom visokog obrazovanja koje se sastoji od prvog, drugog i trećeg ciklusa, što je na naš zahtjev potvrdila i Agencija za razvoj visokog obrazovanja i osiguranje kvaliteta u svom

aktu broj 06-33-1-643-2/15 od 26.8.2015. godine. U istom aktu, Agencija za razvoj visokog obrazovanja i osiguranje kvaliteta je potvrdila i mišljenje da su u ranijem sistemu stručnih sprema postojale samo četiri vrste stručne spreme – niža, srednja, viša i visoka (sa čim se nije smio miješati pojam stručnog zvanja odnosno struke, kojih ima veći broj).

Pored toga, u svom mišljenju broj 09-02-4-7073-1/15 od 23.7.2015. godine, koje se odnosilo na ranije stručne spreme (prije implementacije Bolonjskog sistema), Ministarstvo pravde BiH je potvrdilo stav Agencije za razvoj visokog obrazovanja i osiguranje kvaliteta, u smislu distinkcije pojma stručne spreme i struke (zvanja, odsjeka, smjera itd.), a u kontekstu radnog iskustva, te naglasilo da se pod radnim iskustvom računa svo (kompletno) radno iskustvo na poslovima visoke stručne spreme, od momenta kada je visoka stručna sprema prvi put stečena. Iako se navedeno mišljenje Ministarstva pravde odnosilo na drugačiji i uži kontekst (sticanje dviju isto vrednovanih ali različitih struka, odnosno stručnih zvanja u okviru iste – visoke stručne spreme, te u vezi s tim radnog iskustva), isto se može shodno primijeniti i na konkretni slučaj sticanja visokog obrazovanja koje se različito vrednuje, u kontekstu sticanja radnog iskustva.

Saglasno izloženom, za prihvatanje radnog iskustva kao validnog od značaja je samo datum kada je visoka stručna sprema (prvi put) stečena, odnosno kada je kandidat prvi put stekao diplomu visoke stručne spreme – visokog obrazovanja, jer je naknadno sticanje diplome iste stručne spreme i istog ciklusa, samo sa većim brojem ECTS bodova, od značaja samo za ispunjavanje posebnog uslova koji se odnosi na stručnu spremu, ali nije od značaja za ispunjavanje posebnog uslova koji se odnosi na radno iskustvo u struci.

Preciznije, licu koje završi visoko obrazovanje i stekne diplomu sa 180 ECTS bodova, priznaje se svo radno iskustvo (naravno, stečeno na poslovima za koje se traži visoka sprema), bez obzira na naknadno sticanje visokog obrazovanja – diplome koja se vrednuje sa 240 ECTS bodova, za radna mjesta za koja se traži 240 ECTS bodova. Takođe, isto je primjenjivo na lice koje završi visoko obrazovanje i stekne diplomu sa 180 ECTS bodova, a potom stekne diplomu drugog ciklusa sa 300 ECTS bodova u istoj struci, sa napomenom da eventualna prijava takvog lica na oglase za upražnjena radna mjesta gdje je kao poseban uslov naveden 240 ECTS bodova, jeste prihvatljiva, imajući u vidu da je u konkretnom slučaju lice steklo više ECTS bodova, nego što je oglasom traženo. Isti princip bi se primijenio i u pogledu višeg ciklusa (trećeg) visokog obrazovanja, iako u dosadašnjoj praksi nisu zabilježeni slučajevi gdje se za radno mjesto traži više od prvog ciklusa.

Međutim, takav kandidat treba dostaviti i svoju prvobitnu diplomu (180 ECTS bodova), jer mora dokazati kada je visoku spremu odnosno visoko obrazovanje stekao prvi put, inače bi mu se prijava odbacila zato što nije dokazao od kada mu je radno iskustvo u visokoj spremi počelo teći.

Na kraju važno je istaći da se ovaj akt odnosi samo na vrednovanje radnog iskustva koje uvijek počinje teći od momenta prvog sticanja visokog obrazovanja, ali da ovo pojašnjenje nema uticaja na ispunjavanje uslova sa aspekta odgovarajućih diploma u odgovarajućem broju ECTS bodova i odgovarajućoj struci (zvanju, tituli), o čemu ćemo informisati posebnim pojašnjenjem.

S poštovanjem,

Dostavljeno:

- naslovu
- arhiva



DIREKTOR

Neven Akšamija